

das Fieber/ also eygentlich genant/ bey demselben muß man nun betrachten die Vnderscheide neben deroselben Ursachen vnd Zufällen. Seynd demnach drey fürnemme Vnderscheide des Fiebers/ als nemlichen/ Hectice, das ist schwinne Fieber/ tägliches Fieber vnd behaltende Fieber.

Das schwinne Fieber ist ein Hitze wieder die Natur angezündet in den edelsten vnd stärcksten Theilen des menschlichen Körpers/ welches seinen Sitz oder Wohnung hat genommen in dem Herzen/ vnd nimpt den ganzen Leib ein: aber dieweil dasselbe nit mehr hat / dann einen access oder Anstoß nach dem Anfange/ bis zum Ende/ so betrachtet man dasselbig allezeit in dreyerley Maniere vnd Weise/ nach vngleicher disposition des Leibes.

Das tägliche Fieber ist eine andere Art des Fiebers/ welches nur einen Tag wehret/ vnd kompt von einer hitzigen Euaporation oder Dampffigkeit des Herzen.

Das Continens oder behaltende Fieber ist auch eine Art der Fieber/ welche sich hält in den Feuchtigkeiten (als im Geblüt vnd Cholerischen Feuchtigkeiten) vnd kompt vnderweilen wider zum andernmal/ gleich als das zufließen vnd abfließen des Meers/ vnd ist dasselbige zweyerley. Ein verfaulendes vnd unverfaulendes Fieber: das verfaulende Fieber ist eine Inflammation oder Entzündung der Feuchtigkeiten/ deswegen es genant wirdt humoralis & biliosa, das ist/ das sich in den Feuchtigkeiten erregt/ vnd ist dieses febris humoralis auch widerumb zweyerley: Eins ist simplex schlecht vnd einfach/ das ander ist composita, oder mehrerley: dz simplex oder schlechte einfache ist widerumb continua, das ist ein beharliches/ oder intermittens das danachläßt. Das beharliche Fieber ist/ wann die Materia im Herzen vnd in den benachbarten Theilen zuhauffe gesamlet/ vberflüssiger/ zäherer oder laimechtiger vnd gröber ist/ vnd dessen seyn auch viererley Art. Als nemlichen/ ein hitziges/ dreytägliches/ viertägliches vnd täglich Fieber. Das beharliche Fieber ist vnder den andern allen das hitzigste/ daher es dann auch Febris ardens, das ist ein hitzig Fieber genant wirdt/ welches allezeit vmb den andern Tag/ eine augenscheinliche Exacerbation oder Hefftigkeit vnd Zunehmen hat/ vnd hat seine Ursache oder Ursprung auß grober Cholerischer Feuchtigkeit/ so da ganz verbrennet ist.

Das